

FORUM ONG TIMOR LESTE THE TIMOR LESTE NGO FORUM



Kaikoli Street, Dili-East Timor/742 2821/726 5169/ 735 9199/ dinorah.granadeiro@gmail.com/nizio_pascal@yahoo.com

FASILITA HUSI:

CORE GROUP TRANSPARANSIA (CGT)

SUBMISAUN SOSIADADE CIVIL

BA

PARLAMENTU NASIONAL COMISAUN C

(EKONOMIA NO FINANCAS E ANTI-CORUPSAUN)

PROPOSTA ORSAMENTU GERAL ESTADU TINAN 2011

Lian Mak Loke.

Timor-Loro-Sa'e nudar Nasaun nebe soberanu no iha direitu atu define nia preoridade dezenvolvimentu nasional nebe tenki refleta tuir nesiedade povo. Dezenvolvimentu nasional presiza partisipasaun maksimu husi intidade hotu-hotu hanesan factor determinante ba progresu nasaun nee iha tempu agora no iha future. Konstitusaun Republika Demokratika Timor-Leste Artigu 145 (a) kona ba Orsamentu Geral do Estado katak " *Governu mak halo Orsamentu Geral do Estado, no Parlamentu Nasional mak sei fo aprovasaun no (b) katak lei orsamntu nian tenke preve, ho baze iha efisiensia no efikasias, diskriminasaun reseita no despeza nian no mos seés husi dotasaun no fundus sekretu sira.* Rendimentu orsamentu geral do estado kuaze 89 % mai husi fundus petrolifera hodi garantia sustentabilidade fundus nee rasik Timor-Leste iha Lei Fundus Petrolifera ho Objektivu ida katak Fundus de petrolifera nu'udar instrument ida atu administra rekeza mina-rai nian ho matenek/ didi'ak hodi benefisia jerasaun agora no jerasaun sira aban-bain rua nian.

Tabela gastus orsamentu Geral do Estado husi tinan 2005-2010.

Category	2005-06	2006-07	2007 anualized	2008 Original	2008 Rektif	2009	2010 Orig	2010 Rektifi	Proposta 2010
Salaries	28.8	37.4	39.0	48.0	58.9	93.9	97.7	99.1	115.9
Good end service	52.7	103.6	146.2	143.7	447.4	247.3	210.3	268.8	270.5
Transferensia Publiku	0.0	18.2	24.2	63.9	132.2	96.4	105.4	184.6	164.5
Minor Kapital	5.6	16.9	5.9	24.5	39.2	38.1	29.8	34.5	28.3
Kapital dezenvolvimentu	36.7	113.3	17.4	67.6	110.6	205.4	216.8	251.0	405.9
Total	123.8	289.4	232.7	347.7	788.3	681.1	660.0	838.0	985.0


Iha lora 15 Novembru 2010 konselho ministru aprova orsamentu geral do esatado baa tinan fiscal 2011 ho motante total orsamentu hamutuk \$ 934,740 miliaun de dolar Amerikanu. Ho nunee liu husi Comisaun C asuntu ekonomia no financa fo oportunidade atu Sosiadade sivi fo nia hanoin

antes debate iha plenaria Parlamentu nasional. Tamba nee Forum Organizaun Naun-Govermental Timor-Leste hala'o nia knar hanesan kontrolu social, trasformasaun social no parseiru dezvoltamentu ba institusaun estado ho konsiensia moral, social no'o politika hakarak transmite ba orgaun soberanu hanesan Parlamentu Nasional nudar legislativu no fiskalizador, nebe hetan konfiansa politiku liu husi jogu no regras demokratika hodi halao funsaun no knaar legitimu atu sai mata dalan ba Povo iha uma fukun Parlametu Nasional. Fundamentu argumentu hirak nee liu husi Forum Organizaun Naun Govermental hakarak hatoo aspirasaun ba situasaun sosial no pilitika nebe ho kestoens de prinsipiis rejultadu analiza nebe klean ba Orsamentu Geral do Estado tinan 2010 nebe agora dadaun atu debate iha Parlamentu nasional.

I. Gastu iha nivel ida ne'e la prudente no la sustentavel.

Proposta orsamentu ba tinan 2010 sei gasta tokon \$985.000 husi Timor-Leste nia osan durante tinan oin-mai, inklui tokon \$734 ne'ebe transfere husi Fundu Petroleu durante tinan 2011 no tokon \$141 mai husi osan restu ne'ebe la konsege gasta iha Orsamentu 2010, osan sira hotu mai husi Fundu Petroleu. Ka bele hateten, 89% husi orsamentu ida ne'e finansia husi ekstrasaun no eksportasaun riku-soin naunrenovavel, gas no petroleu Timor-Leste ne'ebe konverte ba osan dolar. Orsamentu 2011 reprezenta gastu ne'ebe sae maka'as liu fali tinan balun liu ba, kresimentu ida ne'ebe governu hakarak atu kontinua iha futuru. Entre 2006 no 2012, Orsamentu Jeral Estadu sei sae dalas lima, husi tokon \$262 ba tokon \$ 1,280, no rata-rata kresimentu orsamentu estadu annual nian 30%. Maibe benefisiu ba povo Timor-Leste la aumenta sai dalas lima.

Gastu Estadu nian durante ne'e (inklui ajensia autonomia)
Ezekusaun orsamentu 2002-2009. Planu orsamental 2010-2015.




Hanesan grafika iha leten hatudu, orsamentu estadu 2011 hetan kresimentu ne'ebe boot liu fali 2010, no 2012 sei aumenta as liu tan. Ami hare katak orsamentu ne'e la adekuadamente konsidera osan sira ne'e mai husi ne'ebe. Dokumentu orsamentu nian demonstra katak Governu labele hatudu katak karik estadu gasta osan barak husi Fundu Petroleu iha tempu badak ne'e, ita nia osan sei menus iha future.

Iha tabela 5.8 no 5.9 husi kapitulu rendimentu nian iha livru 1, balansu futuru Fundu Petroleu nian no Rendimentu Suntentavel Estimadu (RSE/ESI) projetadu ka kalkula ona ho asumsaun katak Governu sei foti deit montante RSE/ESI kada tinan-tinan. Governu halo tina prediksaun ida ne'ebe optimistiku kona-ba futuru presu mina-rai iha merkadu mundial nian, no halo asumsaun katak

investimentu husi Fundu Petroleu nian sei hetan retornu 4% liu fali inflasaun. Iha kazu ne'e, montante Fundu Petroleu gradualmente aumenta sae, to hetan biliaun \$14.6 iha fin de 2015 no biliaun \$31.7 iha tinan 2035.

Ida ne'e hatudu iha grafika ida iha okos, ho linha kor mean kot-kotuk (eixu da direita) indika montante ne'ebe foti husi Fundu Petroleu kada tinan-tinan, no linha kor mean tomak hatudu katak balansu iha Fundu Petroleu.

Foti osan husi Fundu Petroleu sei fo influencia ba iha futuru.




Grafiku husi La'o Hamutuk basea omi nia analizo informasaun husi OGE 2010 no 2011 husi Ministeriu Finansas RDTL nian.

Maibe, tabela 4.2 iha kapitulu gastu nian husi Livru Orsamentu 1 esplika katak Governu iha planu atu foti tokon \$418-\$526 as liu RSE/ESI husi Fundu Petroleu kada tinan hahu iha tinan 2012 (linha kor matak kot-kotu iha eixu da direita), hodi estabeselese kresimentu annual 3.5% iha gastu estadu nian hafoin eleisaun 2012. Iha kazu ne'e, balansu iha Fundu (linha kor matak tomak) hahu atu tun iha 2025, no Fundu sei uza hotu iha tinan 2035 karik laiha ona projeitu gas ka mina-rai atu mai tan hodi troka Bayu-Undan no Kitan.

II. Orsamentu halo asumsaun la prudente ba presu mina-rai.

Iha proposta Orsamentu 2011, Governu halo asumsaun katak futuru presu mina-rai iha merkadu mundial nian sei diak liu maizumenus 50% as liu fali ba presu ne'ebe governu halo iha Orsamentu Estadu 2010, asumsaun ida ne'ebe Sosiadade Civil hare viola rekizitu Lei Fundu Petroleu ne'ebe hateten katak "asumsaun hotu ne'ebe halo tenke prudente." Asumsaun presu as nian uza hela ba senariu rua ne'ebe diskute iha leten. Karik senariu ida kalkula fila fali ba dadus bazeia ba asumsaun presu mina-rai ne'ebe sira halo iha orsamentu estadu 2010, ho nivel gastus nian iha orsamentu estadu 2011, balansu Fundu Petroleu iha fin de 2015 iha deit biliaun \$10.5 (linha tolu ho kor roxo), no Fundu Petroleu sei hotu tomak iha tinan 2030. Governu ida ne'ebe sei kaer mandate iha tinan 2017 sei iha biliaun \$13.9 iha Fundu Petroleu, kompara biliaun \$17.1 karik gastus estadu nian mantein iha nivel sustentavel.



Hanesan grafika iha leten hatudu, presu mina-rai global tun-sae lor-loron. Laiha ema ida ne'ebe bele halo prediksaun lolos ba saida mak sei akontese iha fulan ne'en nia laran, entaun imposivel atu halo prediksaun presu ba dekadu ida nia laran. Laiha ema ida iha mundu ne'e mak bele halo prediksaun folin mina-rai sei to iha nivel as liu \$145 kada baril ida no monu tun liu ba \$30 kada baril ida hanesan akontese iha 2008. Tamba ne'e, Lei Fundu Petroleu husu asumsaun ida ne'ebe konservativu- diak liu atu asegura hodi halo prediksaun ida ne'ebe kiik liu no sei iha osan ekstra iha Fundu Petroleu duke halo prediksaun ida ne'ebe as liu no halakon benefisiu husi rekursu naun renovavel Timor-Leste nian ba ita nia oan sira.

Asumsaun presu mina-rai iha orsamentu estada 2011 aumenta sae kada tinan-tinan hafoin 2011, to \$114 kada baril ida iha 2025, no kalkulasaun Rendimentu Sustentavel Estimadu RSE/ESI tinan 2011 token \$734. Sosiadade Civil hanoin katak diak liu tan atu uza asumsaun ba presu mina-rai nian iha 2010 ne'ebe nia kresimentu to \$70 kada baril iha 2025, no husi ne'e RSE/ESI iha tinan 2011 token \$527 tuir asumsaun seluk husi governu.

III. Planu Ministeriu Agrikultura no Peskas la reflète obstaklu agrikultor sira.

Prioridade orsamental 2011 ba ministerio Agrikultura e Pescas iha objektivo nebe mak ministeriu Agrikultura no Peskas planea mak hanesan :

- Hasae produsaun alimentar (batar ho produto hortikulas) liu husi dalan uza teknologia foun no transferensia konhesimento, no mos gestaun integrada fini nian, sistema kuda hare intensive, mekanizasaun no apoio adubos no pestisida.
- Promove produsaun animal hanesan programa piloto ba intensifikasaun hakiak animal hanesan: bibi, fahi, manu no programa saude animal nian.
- Rehabilitasaun no protesau iha fatin protegidas liu husi produsaun viveiros, promosaun kuda aihoris iha area kritikas, taumatan iha area protegidos no konsensializasaun ba comunidade atu proteje riko soe floresta nian

Prioridade orsamental 2011 ba ministerio agrikultura e peskas tuir Sosiadade Civil nia analiza sei la fo benefisio direktamenta ba agrikultor sira tanba despeza nebe mak atu halo barak liu atu hola mina ba tratores, halo manutensaun ba tratores, hola adobos no pestesida kimika, fini hibrida nebe osan barak sei sai ba rai liur hotu.

a) Orsamento ba Ministerio Agrikultura e Pescas 2011 kompara ho tinan 2010 tun:

Bainhira ita hare orsamento 2011 ba ministerio Agrikultura e Pescas tun besik Milhaun \$ 4, iha Orsamentu Geral Estado 2010 nebe aloka ba ministerio ne US\$16,397 milhoes kompara ho Orsamentu Geral Estado 2011 ba ministerio Agrikultura e Pescas nebe US\$ 12,909 milhoes. Ministerio Agrikultura e Pescas nia knar importante tebes nebe hare ba seitor

importante hanesan agricultura, floresta no pescas, nebe besik 80% povo Timor depende ba agricultura. Bainhira ita fahe orsamento ne ba seitor 3 ne seitor agricultura e hortikultura hetan: US\$ 3,169 milhoes, floresta hetan US\$ 451 mil, pescas hetan US\$1,093 milhaun, pekuaria hetan US\$798 mil. Hare ba orsamento nebe mak governo aloka ba ministerio Agricultura e Pescas hatudu katak agricultura, floresta e pescas seidauk sai prioridade bot ba governo. Kompara ho Orsamento nebe mak governo aloka ba ministerio Turismo Comercio e Industria (MTCI) ba fundo seguransa alimentar (importa fos) nebe hamutuk US\$ 14,208 milhoes bot liu fali ministerio agrikultura nebe mak tuir los nia knar mak atu garante seguransa aihan iha rai laran.

b) Governo la fo konfiansa ba ministerio Agricultura atu administra orsamento bo`ot :

Maske orsamento nebe governo aloka ba ministerio atu administra rasik hamutuk US\$ 12,909 milhoes maibe governo mos aloka US\$ 9,314 ba aktividade agrikultura liu husi Pakote Dezenvolvimentu Desentralizasaun nebe mak administra direktamente husi ministerio Estatal no US\$ 1,819 milhaun ba konstrusaun irigasaun nebe administra husi ministerio infrastrutura. Hare ba ida ne signifika katak governo ladun fo konfiansa ba ministerio agricultura atu administra orsamento ba aktividade ka projecto nebe iha relasaun ho dezenvolvimento agricultura. Ida ne bele afekta ba sustentabilidade ho kualidade projecto sira nebe halo relasiona ho projecto agrikultura nia. Iha plano estrategiko dezenvolvimento nasional (PEDN) konaba politika no estrategia irigasaun hateten katak dezenvolvimento infrastrutura irigasaun responsavel Direccao Nacional da Irigacao e Gestao da Utilizacao de agua iha Ministerio Agrikultura e Pescas nia okos konaba kazu konstrusaun ho manutensaun infrastrutura fisiko husi dam no nia skema irigasaun nian, maibe realidade governo kria fundo infrastrutura multiannual iha ministerio infrastrutura nia okos atu gere konstrusaun ba irigasaun. Iha Pakote Dezenvolvimentu Desentralizasaun governo aloka orsamento US\$9,314 milhoes iha ministerio Estatal ba projecto agrikultura nian hanesan irigasaun no seluk tan. Iha parte ida diak tamba governo hahu hakarak desentraliza orsamento estado atu bele ba to iha aldeia no suko sira maibe emtermus de administra orsamento ba projectos sektoral governo tenki hare didiak atu nune sustentabilidade projecto sira ne bele garante. Ministerio agrikultura iha nia Servicos de Agricultura Distrital nebe mak tuir los governo fo kbit ba sira atu bele administra orsamento nebe mak aloka liu husi PDD.

c) Governo la seriu atu dezenvolve agrikultura iha rai laran:

Orsamento nebe aloka ba Ministerio Agricultura e Pescas ba Orsamentu Geral Estado 2011 ne hamutuk US\$12,909 milhoes, bainhira kompara ho Orsamento Geral Estado tina 3 kotuk tun ba babeik. Total Orsamento Geral Estado 2011 (Fundo Konsolidado Timor-Leste) nebe total US\$ 642,700 milhoes, ministerio agricultura e pescas hetan deit 2 %. Ne signifika katak governo ladun fo importansia ba dezenvolvimento seitor agrikultura, floresta, pekuaria no peska. Iha Orsamento Geral Estado 2011 iha Book1 Budget Overview pajina 14 konaba Emprego deskreve katak iha 2010 ema nebe mak dezempregado no aktivo buka servisu hamutuk 350,000 no tinan-tinan besik ema rihun 10 to 15 mak aumenta atu buka kampo de servisu. Husi total ema 350,000 nebe desempregado no buka servisu seitor privado no seitor publiko bele absorve deit 10%, no maioria husi numero ema buka servisu ne laiha dalan seluk selae tenki servisu iha area agrikultura nebe subsistem ho produktividade menus. Hare ba esplikasaun ida ne tuir los governo tenki fo atensaun no prioridade bot liu ba Ministerio Agricultura e Pescas atu nune sir abele hadian produktividade seitor agrikultura atu nune bele fo rendimento ekonomiko nebe mak bot ba ema sira nebe mak servisu iha area ida ne.

d) Governo la fo importansia ba dezenvolve agrikultura organiko maibe fo prioridade liu ba agrikultura ho kusto as nian (high external input) :

Iha Plano Estrategiko Dezenvolvimento Nasional (PEDN) ba seitor agrikultura governo la mensiona konaba importansia agrikultura organiko hanesan parte strategiko atu hasai produsaun, maibe governo konsidera fali mekanizasaun no uza adobo kimika ho pestesida kimika mak bele hasae produsaun aihan ba kurto prazo nian (2011 – 2015). Politika ida ne refleka iha Orsamnto Geral Estadu 2011 ba ministerio Agrikultura governo aloka orsamento iha item Bens e Servicos ho total US\$ 2,718 milhoes atu hola kombustivel (mina) 2,299,950 litors (bainhira ita kalkula mina litro 1 ba US\$0.85 maka osan nebe mak atu gasta ba sosa mina total US\$ 1,954,957.50 iha tinan 2011 nian laran) ba operasaun trator bot ho medio 315 no hand trator 2,591, kompara ho plano ministerio agricultura nian nebe atu sosa adobo organiko karon rihun lima deit iha orsamento 2011 ne Ministerio Agrikultura la hatudu plano nebe mak klaro konaba atu dezenvolve animal traksaun atu nune iha futuru mai bele troka trator atu fila rai, iha plano hateten deit katak ministerio agrikultura atu hola ekipamento traksaun animal maibe la klaro osan hira mak atu aloka no resultado seida mak espera atu hetan iha tinan ida nia laran

Ministeriu Agrikultura no Peskas (MAP) hetan alokasaun tokon \$12.9 ba tinan 2011. Karik osan ida ne'e fahe ba agrikultor tomak iha Timor-Leste ne'ebe 87% husi populasaun Timor-Leste ne'e (maizumenus ema rihun 928), kada ema ida sei simu \$1.16 kada fulan ida. Montante ida ne'e kiik teb-tebes, karik ita hanoin katak seitor ida ne'e mak sei sai futuru Timor-Leste. Ami hanoin katak Planu Asaun Ministeriu nian ba 2011 la refleka objetivu MAP nian rasik atu aumenta rendimentu agrikultor sira. Planu MAP la refleta ba realidade ne'ebe agrikultor sira iha area rurais sira infrenta, hanesan: Difisil ba agrikultor sira atu fan sira nia produitu. Difisil ba sira atu hasae presu ba sira nia produitu. Difisil ba sira atu adapta sira nia an ba mudansa klimatika.

Ami preokupa tamba maske Planu Asaun Ministeriu Agrikultura e Peskas nian iha hanoin atu hadiak povo Timor-Leste nia diak, maibe planu ne'e laiha asaun ne'ebe klaru hodi promove ita nia rekursu. Ministeriu Agrikultura Peskas laiha planu ne'ebe konkretu atu dezenvolve fini lokal, dezenvolve adubus organiku no pestisida organiku, hodi uza esperiensa ne'ebe ekstensivu ne'ebe ita hetan iha area rurais. Konstrusaun infraestrutur agrikultura nian dala barak la involve komunidadade lokal sira ne'ebe mos nudar agrikultor no nain ba rai. Ami rekomenda ba Ministeriu Agrikultura e Peskas atu inklui mos iha sira nia planu asaun, hanesan tuir mai:

- Oinsa atu aumenta kapasidade agrikultor sira hodi halo prosesamentu ba sira nia produitu, asesu ba merkadu , no jestaun finansiamentu ba sira nia rendimentu.
- Planu konkretu ida kona-ba oinsa atu aumenta kapasidade agrikultor no MAP atu adapta bamudansa klimatika
- Planu konkretu ida atu promove agrikultura organiku, espesialmente hodi dezenvolve fini adubus no pestisida local.
- Hahu atu dezenvove lejislasaun no politika atu promove produitu local, no atu limit importasaun produitu agrikultura husi rai-liur.
- Involve agrikultor sira no komunidadade sira ne'ebe moris depende ba rai in prosesu planeamentu govermental tomak, implementasaun no monitorizasaun ba projeitu, hodi enkoraza projeitu sira ne'e bele fo benefisiu tempu naruk nian ba komunidadade.

IV. Planu Ministeriu orsamentu Edukasaun tinan 2011.

Ba tinan anu fiscal 2011 ministeriu Edukasaun planea orsamentu hamutuk tokon 70, 139 ba ministerio edukasaun husi total proposta orsamentu tokon 985,000.

- **Infrastrutura eskola no fasilidade eskola nian**

Faktus katak eskola barak mak hetan sunu ka hetan estragus liu tiha 30 Agosto 1999. Iha fatin barak iha programa monitoriamentu ONG nian ba eskola barak, estudante no profesores sira kontinua hela iha ambiente la seguru no laudavel ba prosesu aprendizajen. Eskola barak iha encino premaria no sekundaria laiha fasilidade principal sira hanesan bee moos no saneamentu. Estudante no profesores sira kontinua hasoru problema laiha fasilidade biblioteka, laboratorio pratika, laiha salaun reuniaun profesores sira nian, profesores sira laiha salaun atu servisu, karik iha maibe laiha fasilidade atu servisu no laiha fasilidade atu rai-metin dokumentu principal alunus sira nian. Kondisaun ambiental eskola hotu nian la seguru, la saudavel no diak ba prosesu aprendizajen nian.

Fasilidade ba ema raes sira, fasilidade desportu, kultural no pratika relijiaun nian kontinua la hetan atensaun husi Governo. Fasilidade desportu, kultural no relijiaun nian importante ba desenvolvimentu umana, disiplina no moral.

- **Politika, programa no orcamentu ba seitor edukasaun**

Orcamentu estadu ba seitor edukasaun tinan tinan la refleta situasaun real edukasaun iha nasaun. Maiske iha rekonese katak ministerio da edukasaun tama iha kategoria ministerio nebe iha problema mal-jestaun no menus kapasidade ezekusaun, maibe ida ne'e labele uza hanesan sasukat hodi la fornese fundus bo'ot ba hodi atinje prinsipiu edukasaun ba ema hotu hanesan konsagra iha Konstituisaun.

Observa ba situasaun ikus liu nian kona-ba politika no jestaun ba universidade nacional, liuliu kona-ba planu atu taka fakuldade siencia social, fasilidade estudu nebe kontinua la hetan atensaun, laiha tratamentu especial ba kampus tuan (kampus historiku ba libertasaun nian), interferensia ba otonomia kampus, rekrutamentu, protesau no seguransa sosial ba docente sira no planu atu la simu graduasaun tinan sira ba kotuk nian, sira ne'e hotu hanesan problema seriu nebe tenke hetan solusaun ida dura no dia k ba interese nasaun nian. Problema iha prosesu rejistu atu tama UNTL tenke rejolve liu husi hadiak prosedura no sistema diak atu garante katak sei laiha pratika kolusaun no familiarizmu iha prosesu laran.

V. Projeitu "Tasi Mane" hanesan pasu inisiu ba gastus boot iha future.

Orsamentu ida ne'e aloka tokon \$36 husi Fundu Infraestrutura ba "Tasi Mane" infraestrutura koridor petroleu iha kosta sul, maibe orsamentu ida ne'e ba deit pagamentu inisial, ba dala uluk uza ba dezenhu no studu. Hanesan projeitu multi annual sira seluk iha Fundu Infraestrutura, laiha informasaun ne'ebe hato kona-ba kustu total husi projeitu sira ne'e, inklui konstrusaun, operasaun no manutensaun, ne'ebe sei gasta tan dolar tokon ba tokon. Tuir fali mai, dokumentus ne'e mos la hateten sai kona-ba servisu hira mak projeitu ida ne'e sei fo ba trabalhadores Timor oan sira, rai agrikultura no area peska hira mak sei foti ba projeitu ida ne'e, ema nain hira mak sei hetan eviksaun, ka rendimentu hira mak projeitu ida ne'e sei fo estadu. Ami komprende katak dezenhu ne'ebe detailhadu sei presiza atu fo projeksaun ne'ebe klaru ba figura sira ne'e, maibe estimasaun preliminarial esensial atu deside saida mak sira tenke halo. Karik Parlamentu la simu informasaun sira ne'ebe kredibel no bele asesu ba, ami husu atu ba ita boot sira atu labele fo "Check Mamuk" ba projeitu ida ne'ebe ikus mai labele uza no laiha benefisiu. Projeitu sira ne'ebe mehi hela atu halo ba "Tasi Mane" dala barak halao husi investidor no industria privadu sira tamba projeitu sira ne'e sei fo profit iha situasaun barak.

Suporta Governu nian apropriadu hodi enkoraza investidor privadu sira no atu garantia katak sira sei la hasoru difikuldades regulador, no osan balun povo nian presiza atu dada kompania privadu sira ba projeitu marjinal ida. Maibe, karik projeitu sira ne'e hein hela atu halo osan, investidor sira sei implementa projeitu sira ne'e ona. Ami mos preokupa ba montante osan ne'ebe Timor-Leste sei gasta ba peskiza no studu ne'ebe iha relasaun ho possibilidade planta LNG iha rai maran ba gas no mina-rai husi kampu Greater Sunrise. Orsamentu Rektifikativu 2010 inklui ona tokon \$3.1 "ba studu marina iha Beacu husi marina spesialisista", no iha fulan kotuk liu ba Konselhu Ministru fo kontratu ba Toke-EGS4 ba servisu ida ne'e. Proposta orsamentu 2011 aloka tokon \$23.6 atu gasta ba "infraestrutura petroleu no gas" husi Fundu Infraestrutura durante 2011, inklui tokon \$5.8 ba survey detailhadu ba fatin projeitu, dezenhu, no supervizaun ba desenvolvimentu kosta sul iha Beaco" no tokon \$3.5 ba "analiza rute kadoras." Karik projeitu sira ne'e aprova ona, Timor-Leste sei gasta maizumenu tokon \$12.4 ba projeitu ida ne'ebe dala ruma nunca akontese. Maske publiku no Governu Timor-Leste hakarak gas Sunrise nian dada mai planta LNG rai maran ida iha Beaco, operador projeitu Sunrise (Woodside Petroleum, servisu tuir kontratu ne'ebe asina iha 2003, Tratadu Tasi Timor no CMATS no Akordu Unitizasaun

VI. Planu Orsamntu 2011 ba Sekretariu Estadu Rekursus Naturais.

- Kompania mina-rai nasional (PETRONATIL) ne'e perigozu no problematiku. Maske la hateten klaru iha lei orsamentu, proposta Orsamentu 2011 inklui tokon \$2 ne'ebe transfere husi orsamentu SERN atu estabelese PETRONATIL, kompania minarai estadu Timor-Leste nian. Dekretu-lei ba instituisaun foun ida ne'e atualmente konsidera ona husi Konseilu Ministru. Ami hanoin katak PETRONATIL tenke kria husi Lei Parlamentar, la'os dekretu lei, no nia orsamentu tenke aprova no taumatan husi Parlamentu. Infelizmente, dekretu lei ne'e hateten oin-seluk, no halo ajensia ida ne'e ketak husi Parlamentu atu tau matan no transparansia, aliende ne'e fo poder ba ajensia ida ne'e atu halo deve; investe iha rai-liur; gasta rendimentu Petroleu (hakat liu Fundu Petroleu no prosesu orsamentu Parlamentar nian), ignora servisu sivil, aprovisionamentu no regras salariu nian; no loke oportunidade ba korupsiaun no abuzu de poder. Tamba ne'e so deit Parlamentu deit mak iha oportunidade atu partisipa hodi halo desizaun atu estabelese PETRONATIL, ami husu atu ita boot sira uza "poder da bolsa" atu enkoraza Governu hodi kria kompania mina-rai estadu nian atu sai transparente liu, akuntavel, demokratiku, iha responsabilidade no menus risku ne'ebe sei serve interese povo Timor-Leste.
- Institutu Petroleu no Geologia tenke sai departamentu bai-bain iha Governu. Ita la hatene karik orsamentu ne'e aloka capital inisiu ba Institutu Petroleu no Geologia (IPG), ajensia otonomu foun ida (*Institutu Publico*) ne'ebe Governu espera atu kria lalais ho dekretu-lei. Dalaruma nia orsamentu (hanesan mos subsidu ba Autoridade Nasional Petroleu) subar iha transferensia publiku Sekretariu Estadu Rekursu Naturais nian tokon \$4.3 (tokon \$2 sei aloka ba PETRONATIL) ka tokon \$1.2 ne'ebe SERN sei gasta ba "servisu profesional." Ami espera katak Komisaun D mak bele hetan esplikasaun husi Governu kona-ba aloksaun orsamentu ba ANP no IPG. Sosiadade Civil sente katak dekretu-lei ba IPG la nesesariu no iha risku. Ami suporta estabesimentu orgaun estadu ida ne'ebe efektivu atu kolekta atu jere informasaun kona-ba geologia iha Timor-Leste, inklui ita nia rekursu minerais no petroleu, maibe ami hanoin katak estabesimentu orgaun ida ne'e tenke forma liu husi strutura normal governu nian, tuir prosesu standar ba rekrutamentu, salariu, aprovisionamentu no kontratu. Institutu ida ne'e labele iha poder atu halo imprestimu ka halo parseiru ka halo investimentu ho kompania privadu.

VII. **Planu orsamentu ministru infrastruktura no Fundus Infrastruktura iha Premeiru Ministru nia Okos.**

Infrestruktura sai hanesan Sektor inportante ba dezvoltimentu nasional ba Nasaun Timor - Leste tamba maioria povo hela iha area rural. Kondisaun nebe Husi Ministeriu Infrastruktura hetan mak fal rekursu umanu maibe realidade planu proposta orsamnetu tinan 2011 laiha politika no programa nebe klaru atu aumenta rekursu umanu iha kategoria orsamentu Salariu e Vensimentu.

Wainhira Parlamentu aprova Lei Orsamentu no Jestaun Finanseiru (No.13/2009) iha tinan kotuk, ita boot sira dala ruma la ekspeta katak 1/3 husi orsamentu estadu ne'e muda ba iha "Fundu Spesial" ne'ebe kria tuir artigu 32 husi lei ne'e. Hanesan artigu 32 esplika, fundu "carry over" husi tinan ba tinan, no Ministru/a Finansa (ho aprovasaun husi Konseilu Ministru) bele muda osan ne'ebe sira aloka tiha ba buat seluk, naran katak informa ba Parlamentu. Atu habadak deit, bele hateten katak poder Parlamentu nian atu halo no fiskaliza orsamentu estadu sei lakon ba Konseilu Ministru. Fundu Infraestrutur ne'e iha intensaun atu fasilita implementasaun Planu Estratejiku Dezvoltimentu Nasional (PEDN), ne'ebe eventualmente fo ba Parlamentu atu hetan aprovasaun. Governu to ohin lora seidaun publika sai esbosu PEDN, no Primeiru Ministru diskute deit PEDN nia objetivu durante nia sosializasaun iha sub distritu, ho laiha informasaun kona-ba implementasaun, kustu ka tempu. Tamba ne'e, ami hanoin katak ne'e sedu liu ba Parlamentu atu halo aprovasaun ba osan dolar tokon ba tokon hodi ezekeza PEDN. Hafoin planu ne'e hetan ona amendamentu no aprovasaun husi Parlamentu, Governu bele husu atu kria Fundu Infraestrutur, no nia alokasaun orsamentu nian bele halo iha Orsamentu Rektifikativu iha tinan-klaran 2011 ka Orsamentu Jeral Estadu 2012. Buat sira nudar desizaun ne'ebe boot ho impaktu tempu naruk ba povo Timor-Leste, no la bele halo ho atrapalha. Gastu boot iha Fundu Infraestrutur ba 2011 mak iha parte sentral eletrika oleu pezadu no linha transmisaun ne'ebe problematiku ho montante tokon \$166, ne'ebe iha ona mudansa barak ba nia dezenhu, revizaun ba kontratu, no hahu atu servisu depois komesa iha 2008. Timor-Leste gasta ona besik tokon \$100 ba projeitu ida ne'e iha 2008-2010, no kustu total sei liu tan tokon \$600. Promesa orijinal mak atu fornese eletrisidade oras 24 ba kada capital distritu sira iha fin de 2009 haluha tiha ona, ne'e klaru ona katak promesa atu kompleta projeitu ida ne'e iha fin de 2011 sei la konsege atu atinji. Ami enkoraza Parlamentu atu hanoin ho kuidadu molok aloka orsamentu ne'ebe la limitadu ba projeitu obstaklu ida ne'e, no insiste katak Governu hodi fo informasaun ida ne'ebe kompleitu liu kona-ba atividade pasadu no agora, no planu ba futuru, kostu jestaun no total kustu projeitu. Proposta Lei Orsamentu Jeral Estadu ba 2011 dala ruma sai oportunitade ikus ba Parlamentu atu ezerse nia kompetensia relasiona ho Fundu Infraestrutur no Fundu Dezvoltimentu Kapital Umanu, hanesan sira kria tiha ona, autoridade tomak sei ba Ministru sira.

Faktu mak, Fundu Infraestrutur sei hare hanesan tentasaun atu obriga se se deit mak manan iha eleisaun 2012, ho projeitu inisiu ne'ebe sei difisil atu modifika maske karik votantes sira hili Governu foun. Ami husu ba ita boot sira atu la bele aprova Fundu Infraestrutur to ita-boot sira simu :

- Estimasaun total kustu kada projeitu atu implementa, inklui dezeinhu, konstrusaun, operasaun no manutensaun kada tinan-tinan. Artigu 3.3 Lei Orsamentu no Jestaun Finanseiru ezizi katak informasaun sira ne'e tenke halo ba 2011 no 2012. Maske dokumentus Orsamentu nian fo deit ba 2011, Parlamentu tenke ezizi informasaun durante kada projeitu uza fundu estadu.
- Orariu ba dezeinhu, konstrusaun no realizasaun husi kada projeitu tinan barak.
- Informasaun detailhadu kona-ba progresu sentral eletrika nasional no linha transmisaun, inklui kontratu tomak mudansa dezeinhu ne'ebe halo tiha desde karta

Primeiru Ministru nian ba Parlamentu iha Novembru 2009, no mos revizaun orariu no kustu projeksaun.

- Iha komitmentu juridika ida ne'ebe kesi katak projeitu sira ne'ebe promote ba Parlamentu iha dokumentu orsamentu sei hari bainhira Parlamentu aprova fundu realokasaun.
- Lei Parlamentu ida ne'e promulga ona atu aprova Planu Estratejiku Dezenvolvimentu Nasional.
- Dekreitu lei ida ne'ebe promulga ona atu estabese Ajensia Dezenvolvimentu Nasional (ADN).
- Lei ida ne'ebe promulga ona atu regula prosesu aprovisionamentu atu uza projeitu sira ne'ebe lukrutivu, no Fundu Infraestrutura ne'ebe kompleksu, inklui Termus da Referensia ne'ebe detailhadu, tenderizasaun ne'ebe transparente no nakloke no kontratu ne'ebe fo sai tenke anuncia ba publiku.

Fundu Infraestrutura kria ajensia foun estadu nian ida ho esforsu atu hadiak defisiensia funsaun governmental nian, ne'ebe laiha abilidade atu ezejuta projeitu infraestrutura. Fundu ida ne'e atu muda direasaun hodi distribui autoridade jestaun projeitu nian husi linha ministerial ba autoridade lokal (liu husi Pakote Referendum no PDD), sentraliza projeitu sira ne'e iha ADN no EPIA ne'ebe seidak estabese. Mudansa structural la bele hadiak frakeza fundamental. Karik lider estadu sira iha komitmentu no kapasidade (inklui komprende ajuda saida mak sira prezisa) atu resolve problema ida ne'e, sira sei halo la'os ho strutura no karik sira la halo hanesan ne'e, laiha mudansa iha ne'ebe sira halo ho signifikante diferente.

VIII. Fundu Dezenvolvimentu Kapital Umanu prioritiza estadu liu fali sidadaun sira.

Ami hanoin katak populasaun edukadu nudar xave ba dezenvolvimentu ekonomia Timor-Leste, hanesan mos atu dezenvolve funsionamentu instituisaun estadu no moris povo nian. Maibe planu tempu badak ho lalais sei labele ajuda atu atinji objetivu ida ne'e, hanesan treinamentu no bolus estudu ba funsionariu estadu sira. Ami hare katak planu ida ne'e laiha konsensia ne'ebe iha proposta orsamentu 2011 aloka montante osan dala rua (tokon \$12.952) ba bolsu estuda hodi haruka estudantes balun deit ba rai-liur duke osan ne'ebe sira atu aloka ba Universidade Nasional Timor-Leste (tokon \$6.355).

Mayorita bolsu estudu ida ne'e ba deit funsionariu publiku sira, no ami espera katak sira nia kustu edukasaun nian sei dezenvolve funsionamentu instituisaun estadu iha tempu badak nia laran, redus dependensia ba asesor internasional sira no konsultan nasional. Maibe iha mediu no longu prazu, Timor-Leste nia sistema edukasaun, husi eskola primaria to universidade, tenke fo komprendesaun ba ita nia povo sira, matenek no skill atu servisu iha instituisaun estadu, seitor privadu, investidor rai-liur ka ita nia bisnis rasik. Ida ne'e mak xave ba dezenvolvimentu iha Singapura no nasaun kiik sira seluk, no ida ne'e deit mak dalan uniku atu dezenvolve Timor-Leste. Aliende ne'e, atu fo edukasaun ida ne'ebe diak liu ba povo Timor-Leste ho numeru boot, prioritizasaun ba instituisaun lokal bele ajuda funsaun Governu nian sai diak liu tan. Iha Komisaun D nia audensia semana liu ba, Prezidente Komisaun D suzere katak estudantes UNTL no dosentes sira bele halo peskiza atu ajuda Komisaun D hodi kompriende situasaun agrikultura iha baze. Ida ne'e ilustrasaun ida oinsa atu haforsa Universidade Nasional, ho matenek husi fakuldade nian no estudante sira ne'ebe edukadu ho diak, sei ajuda dezenvolve nasaun ida ne'e. Timor-Leste bele gasta osan mina-rai nian ba edukasaun rai liur ne'ebe karun, elites ba tempu badak nia laran deit. Se mak sei troka funsionariu publiku sira ohin loron karik sira retira ona? Se mak sei prepara trabalhadores sira ba industria no ajensia barak ne'ebe ita mehi hela Planu Estratejiku Dezenvolvimentu Nasional, ka atu hahu no halao bisnis ne'ebe bele atu substitui importasaun no aumenta valor ba ita nia produitu agrikultura?

IX. Ministeriu Saude.

Orsamentu Ministerio da Saude 2011 kompara ho 2010

no	Item	2009	%	2010	%	2011	%
1	salario bensimentu	9,042	31	10,369	28	10,778	28
2	Bens Servisus	14,549	50	19,015	51	15,148	40
3	Capital Minor	1,126	4	1,427	4	1,643	4
4	Capital Dezemvolvimentu	4,141	14	5,700	15		
5	Trasferensia sia Publiku			1,030	3	10,345	27
	Total	28,858		37,541		37,914	

Bazeia ba komparasaun proposta orsamentu ba Ministerio da Saude hahu husi tinan 2009 – 2011 hatudu katak prezentazen ba kustu nebe aloka iha balansu entre orsamentu nebe aloka ba povu kompara ho orsamentu nebe sei gasta deit iha eskretorio laran husi capital salario bensimentu no capital minor.

Ami prekupa kona ba estudante medisina nebe akaba nia studu iha Cuba oinsa sira nia future lolos tamba agora sira iha Timor-Leste tamba Orsamentu ba tinan 2011 rekrutamentu ba funsionariu Saude maibe iha osan nebe tama iha kategoria fundus trasferensia publiku nee hatudu katak planu ministeriu saude ba asuntu nee la integradu ba katogoria orsamentu nebe planea.

Ami mos apresia tebes ba politika alokasaun orsamentu Ministerio da Saude nian nebe tau konsiderasaun boot ba saude komunitaria hodi aloka fundu trasferensia publiku ho montante US \$. 6000,000,00 milloens ida ne'e bele ajuda diak liutan programa saude komunitaria liu-liu ba programa SISCa ne'ebe sei hala'o iha Suco 442 iha teritorio Timor Leste tomak.

X. Pakote Dezenvolvimentu Desentralodadu no I no No II.

Iha tinan 2010 governo halo ona projetu Pakote Dezenvolvimentu Desentralizadu (PDD) bazeia decretu lei no.2/2010 konaba proseduramentu special hodi fo konstrusaun civil to'o USD 250,000 ba kompnha local sira iha Sub-Dustrito iha tinan 2010 \$ 31.356. Hahu husi inisiu Sosiadade civil nebe halo mos monitorizasaun konaba projetu hirak ne'e hetan rezultadu positivu balu hanesan fo kapsitasaun ba empzezario local sira no kapasita mos governo local sira hodi halo ezekusaun ba orsamentu iha distrito. Maibe iha mos failansu balu husi implementasaun orsamentu ne'e rasik tanba mekanismu nebe governo kria liu husi Ekpa Konjuntu Distrital la integradu tanba la iha transparensia konaba dokumentu projetu nebe lolos ema hotu tenke iha asesu maibe realidade iha distrito barak akontese administrador sub-distrito no chefi suco sira la iha asesu konaba dokumentu hirak ne'e iha parte balu liu husi Sosiadade Civil nia resultado monitorizasaun detekta katak projetu PDD ne'e rasik laos atu fo benefisio ba comunidade sira maibe fo liu benefisio ba empzezario sira razaun ne'e ami hato'o tanba projetu balu laiha kualidade maibe orsamentu nebe mak aloka ba projetu ne'e boot liu fali volume projetu ida ne'e hatudu katak prosesu PDD ne'e rasik laiha planu nebe integradu ho nesedidade lolos. No iha tinan 2011 bazeia ba governo nia planu sei kria tan projetu PDD no aumenta volume orsamentu USD 500.000. Mesmu iha ona lei nebe fo dalan atu kria projetu hirak ne'e maibe ami nafatin duvida ho kapasidade empzezario sira nian atu garantia kualidade projetu nebe nia volume orsamentu sei aumenta. No ami fiar katak PDD 1 no PDD 2 sei nafatin la fo benefisio ba comunidade sira maibe nafatin ba benefisio ba empzezario sira.

XI. Ministeriu Ministeriu Turismo Comersio Industria.

Orsamento nebe mak aloka ba MTCI ba item Fundo Seguransa Alimentar ho total US\$ 14,121 milhoes la hakerek detailho katak orsamento ne para importa deit fos ka atu hola produto local hotu. Iha OGE2010 MTCI aloka +/- US\$ 7 milhoes hodi hola produto local maibe realidade comunidade sempre lamenta katak sira nia produto MTCI to agora la hola no ba produto nebe

mak MTCI hola no rai iha armajen barak mak at tanba laiha sistema rai no konserva produto local ho diak. Konaba importasaun fos la klaro tonelada hira mak MTCI planeia atu hola iha tinan ida ne.

Orsamento nebe mak aloka ba importa fos diak liu balun aloka ba hadian sistema merkadoria produto local atu nune bele garante produto local bele absorve iha merkado nasional. Servisu hamutuk ho ministerio agrikultura atu identifika potencia produsaun aihan iha distrito tomak atu nune bele estabeselele sistema informasaun konaba produto aihan nebe iha, iha distrito tomak atu bele ajuda sistema distribuisaun fan aihan iha nivel distrito, regional no nasional. Hari sentro merkado produto local iha distrito, regional no nasional nebe nia funsaun atu halibur no distribui aihan ba teritorio tomak. Halo kordenasaun diak ho ministerio agrikultura atu hatene kapacidade produto local (fos) atu nune importansaun fos gradualmente bele hamenus ona.

XII. Rekomendasaun.

1. Mantein nafatin gastus iha nivel sustentavel, bazeia ba projeksaun presu mina-rai iha future. ne'ebe prudente. Proposta orsamentu ne'ebe sai maka'as ba 2011 no 2012 tenke limita, no atu foti osan husi Fundu Petroleu iha tinan oin mai labele liu Rendimentu Sustentavel Estimadu.
2. Halo klaru katak gastus tenke iha koneksaun ho rendimentu, no rendimentu mina-rai ne'ebe sae iha relasaun ho rendimentu estadu ne'e sei akontese temporariu deit.
3. Fo fundus adisional ba Ministeriu Agrikultura no Peskas no enkoraza nia atu implementa politika ida ne'ebe bele hatan ba nesidade agrikultor lokal.
4. Insiste ho klaru kona-ba kustu informasaun no rendimentu no projeksaun kampu servisu ba siklu projeitu tomak iha projeitu Tasi Mane, hodi nune'e Parlamentu bele deside karik projeitu sira ne'e razoavel atu halo investimentu rekursu estadu nian.
5. Evalua katak gastu ho montante boot husi osan povo nian atu prepara planta LNG iha Beacu sei iha valor no vantazem, tamba kompania ho poder atu halo desizaun lakohi atu konsidera opsaun ida ne'e.
6. Prioritize dezvoltimentu ne'ebe maka'as ba iha seitor ekonomia naun-petroleu, ba dala uluk
7. ba agrikultura, atu troka industria mina no rendimentu petroleu temporariu.
8. Rejeita alokasaun orsamentu ba kompania mina-rai nasional PETRONATIL to kompania ne'e estabeselele husi lei Parlamentar ida ho salvaguarda ida ne'ebe adekudu, iha akuntabilidade no transparansia.
9. Rejeita alokasaun orsamentu ba Institutu Petroleu no Geologia nudar institutu autonomu, maibe alokasaun nafatin iha strutura SERN.
10. Rejeita atu estabeselele Fundu Infraestrutura to'o kustu annual nian kompleta no deitalhadu. Kampu servisu, informasaun orariu ba kada projeitu, no to'o Parlamentu aprova ona Planu Estratejiku Dezvoltimentu Nasional, ho Lei no orgaun ne'ebe nesesariu.
11. Insiste katak orsamentu tenke fo prioridade ba edukasaun sidadaun Timor-Leste iha Timor laran duke haruka funsionariu publiku balun ba eskola iha rai liur ne'ebe karun teb-tebes.
12. Permite atu aumenta funsionariu sira ba ministeriu xave sira hanesan saude, edukasaun no agrikultura, no mos atu jere no taumatan ba infraestrutura foun ne'ebe foin haluan ba.
13. Orsamento nebe mak aloka ba importa fos diak liu balun aloka ba hadian sistema merkadoria produto local atu nune bele garante produto local bele absorve iha merkado nasional. Servisu hamutuk ho ministerio agrikultura atu identifika potencia produsaun aihan iha distrito tomak atu nune bele estabeselele sistema informasaun konaba produto aihan nebe iha, iha distrito tomak atu bele ajuda sistema distribuisaun fan aihan iha nivel distrito, regional no nasional. Hari sentro merkado produto local iha distrito, regional no nasional nebe nia funsaun atu halibur no distribui aihan ba teritorio tomak. Halo kordenasaun diak

ho ministerio agrikultura atu hatene kapasidade produto local (fos) atu nune importansaun fos gradualmente bele hamenus ona.

14. Iha futuru diak liu ministerio agrikultura aloka orsamento nebe mak bot atu promove agrikultura organiko iha rai laran atu nune gradualmente bele troka adobos kimiko nebe mak hahu introduz makas iha rai laran nebe la fo benefisio ba agrikultor sira, hamosu dependensia ba external input no estraga meio ambiente atu nune ita nia nasaun bele sai Organic State iha futuru. Iha estudo no esperiensia barak ona nebe hatudu evidensia katak agrikultura organika mos bele hasai produsau aihan no kualidade aihan diak liu kompara ho produto aihan nebe uza adobos kimiko.
15. Seitor agrikultura fo servisu ba ema barak, tuir sensus 80% husi povo Timor Leste moris husi agrikultura, atu bele asegura sira nia produtividade agrikultura atu bele garante seguransa aihan no hadian sira nia moris ekonomia uma kain nian, governo tenki iha kalkulasaun matematis konaba persentajen orsamento nebe justo ba ministerio ne husi total OGE tinan nian
16. Orsamento nebe mak governo aloka ba projecto agrikultura tuir ami nia hare diak liu orsamento ne administra direktamente husi Ministerio Agrikultura atu nune utilizaun projecto sira ne bele iha nia sustentabilidade. Karik governo hakarak dezentaliza orsamento ba projecto agrikultura nian liu husi PDD diak liu fo kbit ba ofisial agrikultura distrital atu administra orsamento rasik iha sira nia dietrito rasik. Projecto agrikultura nian nebe administra fali husi ministerio seluk (ministerio Estatal) bele hamosu dezentendimento entre ministerio sira e nia impakto mak projecto sira nebe halao laiha nia utilizaun (ex. Fatin fan ikan nebe hari iha distrito hira liu husi projecto pakote referendum abandonado tanba latuir plano integrado iha ministerio agrikultura). Ba projecto irigasaun nebe nia kategoria hanesan projecto multi annual no gasta orsamento bot bele administra husi Ministerio Infrastrutura maibe tenki iha kordenasaun diak intra ministerial atu asegura sustentabilidade projecto sira ne
17. Seitor agrikultura, pekuaria, peska no floresta importante tebes atu asegura aihan, meio ambiente nebe diak no fo servisu ba ema barak tanba ne iha futuru governo tenki halo estudo klean konaba plano orsamental annual nebe mak diak ba ministerio agrikultura atu bele responde nesessidade agrikultor sira nian, garante seguransa aihan rai laran no valoriza servisu agrikultor sira nian
18. Ami hakarak rekomenda mos ba Ministerio da Saude liu husi fundu nebe aloka ba saude komunitaria atu tau atensaun maka'as ba problema mal nutrisaun atu nune'e bele redus iha tinan 2011.
19. Husu ba Ministrio da Saude atu koopera ho Ministrito Solidaridade Sosial atu kria mekanismu nebe adekuaudu hodi bele tau atensaun atu hasa'e kapasiade dr. Espesialista sira ba moras grave duke ita gasta osan ba ospitais sira iha rai liu hodi fo ba sidadaun sira halo tratamentu iha rai liur.
20. Husi ba ministrio da Saude atu esplika tanba sa proposta ba tinan 2011 la iha item capital dezenvolvimentu?
21. Iha ministri Saude laiha planu nebe detailho kona ba estudantes medisina nebe agora dadaun remata nia estudu iha Nasaun CUBA liu liu kategoria orsamnetu ba Salariu e Vensimentu mais iha deit orsamentu ba Trasferensia Publiku no orsamentu Bens e saervis.
22. Relasiona ho argumentu hirak iha leten husu ba Parleментu hanesan orgaun fiskalizador atu kontrola projeitu PDD 1 no PDD 2 atu nune'e bele garantia kualidade projetu hodi fo benefisio ba povu tomak.
23. Ministrio Estatal tenke halo ligasaun inter ministeriao nebe koordenadu atu labele hamosu tan failansu fahe projetu hanesan iha tinan 2010

24. Ministerio Estetal ho Ministerio sira seluk nebe nia projetu tama iha PDD tenke kria mekanismu adekua ba prosesu tenderizasaun projetu PDD laos liu husi mekanismu ajudikasaun nebe hamosu nepotismu no kolusaun hodi fahe projetu ba maluk deit.
25. Ami sociedade sivil prefere liu atu governu tau atensaun maka'as liu ba PDL hanesan meus nebe diak hodi fasilita komidade sira nia partisipasaun iha planeamentu no implemensaun projetu hodi dezdemvolve rasik sira nia area.
26. Estadu persiza garante katak OJE 2011 iha planu konkreta no realistiku ho alokasaun orcamentu atu bele foka ba kria facilidade eskola hotu nian, liuliu facilidade bee moos, saneamentu no eletrisidade, no hadiak salaun eskola nian hotu atu garante prosesu aprendizajen ida diak, seguru no saudavel.
27. OJE 2011 ba seitor edukasaun tenke reflata komitmentu estadu nian atu hasa'e qualidade rekursu umanu, promove empregu, skills oriented atu bele reduz problema desempregu iha rai laran, hasa'e kompetisaun saudavel iha area laboral no prenxe lakuna kona-ba menus rekursu tekniku iha area hotu iha makina estadu nian.
28. Apoiu maka'as ba universidade nasional liu husi hadiak infrastruktura, hadiak facilidade, seguransa sosial ba docente, promove transparansia, promove otonomia kampus, no haluan liu tan asesu atu bele akumula graduasaun tinan sira kotuk nian no ba oin.

Prepara husi :

Helio Dias da Silva
Sekkretariu CGT

Dili, 15, Desembro 2010.
Koinesementu :

Dinorah S. X. Granadeiro
Direktur FONGTIL

Prepara Hamutuk :

1. Core Group Transparansia
2. Rede Edukasaun
3. Rede Hasatil
4. Rede Feto

Asinatura.....
Asinatura.....
Asinatura.....
Asinatura.....